



UNIVERSITÄTS-
BIBLIOTHEK
PADERBORN

Universitätsbibliothek Paderborn

Acta Ecclesiae Mediolanensis

Decreta Provinciae Mediolanensis Svb B. Carolo Borromeo, Cardinale
Archiepiscopo, Diuersis temporibus in sex Concilijs, totidemq[ue]
voluminibus edita

Speciano, Cesare

Brixiae, 1603

Approbatio Indicis Librorum Prohibitorum cum regulis confectis per Patres
à Tridentina Synodo delectos ac ...

urn:nbn:de:hbz:466:1-10553

ius prodesse, sed nec presentibus, nisi toto ipsarum tenore ad verbum inserto, & gratia ei certa Romani Pontificis scientia facta, & propria manu subsignata, vlla in parte derogatum censi debere, & si illis ex quacunque causa aliter derogari contigerit, derogationes huiusmodi nullius prorsus fore roboris, & momenti. Iubemus igitur vniuersos, & singulos Patriarchas, Primates, Archiepiscopos, Episcopos, & ceteros Ecclesiarum prelatos per vniuersum orbem constitutos, vt per se, vel alium, seu alios presentes literas, aut earum exempla in suis quisque Prouincijs, ciuitatibus, Dioccesibus, & locis solenniter publicare, & quantum in se est, firmiter obseruari procurarent, contradictores quoscumque per censuras, & pœnas Ecclesiasticas appellatione postposita, compescendo, ipsasque censuras, & pœnas etiam iteratis vicibus aggrauando, inuocato etiam ad hoc, si opus fuerit, auxilio brachij secularis. Non obstantibus constitutionibus, & ordinationibus Apostolicis, ceterisque contrarijs quibuscumque. Volumus autem, vt presentium exempla etiam impressa edantur, eaque Notarij publici manu, & cuiuscumque curiæ Ecclesiasticæ, vel prelati sigillo obsignata, eandem illam prorsus fidem vbiq; locorum faciant, quam ipsa presentia facerent, si essent exhibitæ vel ostensæ. Ceterum orbis terrarum Principes, quibus gladij secularis potestas ad malorum vindictam est permiffa, per eam, quam se tueri promiserunt fidem, obtestamur, ita suas quisque partes siue in prestando ministris predictis auxilio, siue in criminum post Ecclesiæ sententiarum animaduersione interponere, vt eorum quoque presidij ministri ipsi tanti officij munus pro Dei æterni gloria, & religionis incremento feliciter exequantur, amplissimum à Domino præmiũ recepturi, quod fidei predictæ assertoribus in eternæ beatitudinis consortio præparauit. Nulli ergo omnino hominum liceat hanc paginam nostræ sanctionis, legationis, statuti, decreti, iussionis, obtestationis, & voluntatis infringere, vel ei ausu temerario contraire. Si quis autem hoc attentare præsumperit, indignationem omnipotentis Dei, ac beatorum Petri, & Pauli Apostolorum eius se nouerit incurfurum. Dat. Romæ apud Sanctum Petrum, Anno Incarnationis Dominicæ, millesimo quingentesimo sexagesimo nono Kal. Aprilis, Pontificatus nostri anno quarto.

APPROBATIO INDICIS LIBRORVM PROHIBITORVM
cum regulis confectis per Patres à Tridentina Synodo delectos ac prohibito illos de cætero habendi, vel legendi.

De declaratione, & expurgatione Indicis habes const. Greg. 13.
Vt pestiferarum const. 10.

De materia librorum prohibitorum est etiam alia const. Pij 4. 108.
Inter crimina, vbi notab.

Pius Papa IIII. Ad perpetuam rei memoriam.

Dominici gregis custodię Domino disponente præpositi, vigilis more pastoris nõ desistimus ipsi gregi ab imminentibus periculis, quanta maxima possumus cura, & diligentia præcauere, nè propter negligentiam nostram peccant oves, que preciosissimo Domini nostri Iesu Christi sanguine sunt redemptæ. Et si autem quæ ad fidei veritatẽ patefaciendam, & ad horum temporum hereses confutandas pertinebant, in œcumenico, & generali Concilio Tridentino, sancti spiritus assistente gratia, nuper adeo enucleata, ac definita fuerunt, vt facile iam sit vnicuique sanam Catholicamque doctrinam à falsa adulterinaque internosceret; tamen cum librorum ab hereticis editorum lectio non modò simpliciores homines corrumpere soleat, verum sæpè etiã doctos eruditosque in varios errores, & à veritate fidei Catholicæ alienas opiniones inducere: huic quoque rei esse duximus prouidendum.

Cum,

Cum autem aptissimum ei malo remedium esse sciremus, si componeretur atque ederet index siue Catalogus librorum, qui vel heretici sint, vel de heretica prauitate suspecti, vel certe moribus, & pietati noceant, id negotium ad Sacram Tridentinam Synodum reieceramus. Ea verò ex tanta Episcoporum, & aliorum doctissimorum virorum copia delegit ad eum conficiendum multos cum doctrina, tum iudicio insignes Prælatos ex omnibus ferè nationibus. Qui quidem non sine maximò labore, plurimisque vigilijs, eum Indicem tandem, Deo iuuante, perfecerrunt, adhibitis etiam in consilium lectissimis quibusdam Theologis. Peracto autem Concilio, cum ex ipsius Synodi decreto is Index nobis oblatus fuisset, vt ne antederetur, quàm à nobis approbatus fuisset: Nos doctissimis quibusdam, probatissimisque prælati eum accuratissimè legendum, examinandumque tradidimus, & ipsi etiam legimus. Cum igitur eum magno studio, acri iudicio, diuturna cura confectum, & præterea commodissimè digestum esse cognouerimus. Nos saluti animarum consulere, eamque ob causam providere cupientes nè libri, & scripta cuiuscunque generis quæ in eo improbantur, siue vt heretica prauitate suspecta, siue vt pietati, ac morum honestati inutilia, aut aliqua correctione saltem indigentia, posthac à Christianis fidelibus legantur, ipsum Indicem, vna cum regulis ei præpositis, auctoritate Apostolica, tenore præsentium, approbamus, imprimique ac diuulgari, & ab omnibus vniuersitatibus Catholicis, ac quibuscunque alijs vbique suscipi, easque regulas obseruari mandamus, atque decernimus. Inhibentes omnibus, & singulis tam Ecclesiasticis personis secularibus, & regularibus, cuiuscunque gradus, ordinis, & dignitatis sint, quàm laicis quocunque honore, ac dignitate præditis, nè quis contra earum regularum præscriptum, aut ipsius prohibitionem Indicis libros ullos legere, habere, audeat. Si quis autem aduersus eas regulas, prohibitionemque fecerit: is quidem, qui hereticorum libros, vel cuiusuis auctoris scripta propter heresim, vel falsi dogmatis suspicionem damnata, atque prohibita legerit, habuerit ve, ipso iure in excommunicationis pœnam incidat: eamque ob causam in eum tanquam de heresi suspectum inquiri, & procedi liceat, præter alias pœnas super hoc ab Apostolica sede, sacrisque Canonibus constitutas. Qui autem libros alia de causa prohibitos legerit, habuerit ve, præter peccati mortalis reatum, Episcoporum arbitrio seuerè se noverit puniendum: Non obstantibus constitutionibus, & ordinationibus Apostolicis contrarijs quibuscunque: Aut si aliquibus communiter, vel diuisim ab eadem sit sede indultum, nè excommunicari possint per literas Apostolicas non facientes plenam, & expressam, ac de verbo ad verbum de indulto huiusmodi mentionem. Vt hæc autem ad omnium notitiam perueniant, neque quis excusatione ignorantis vri possit: volumus, & mandamus, vt hæc literæ per aliquos Curie nostræ Cursores in Basilica Vaticana Principis Apostolorum, & in Ecclesia Lateranensi tunc, cum in eis populus, vt Missarum solennibus interfit, congregari solet, palàm, & clara voce recitentur; & postquam recitatae fuerint, ad valuas earum Ecclesiarum, itemque Cancellariæ Apostolicæ, & in loco solito campi Floræ affigantur: ibique vt legi, & omnibus innotescere possint, aliquantisper relinquantur. Cum autem inde amovebuntur, earum exempla in iisdem locis affixa remaneant. Nos enim per recitationem hanc, publicationem, & affixionem omnes, & singulos qui his literis comprehenduntur, post tres menses à die publicationis, & affixionis earum numerandos, volumus perinde astrictos, & obligatos esse, ac si ipsimet illæ editæ, lectæque fuissent. Transumptis quoque earum, quæ manu alicuius publici Notarij scripta, subscriptæ, & sigillo, ac subscriptione alicuius personæ in dignitate Ecclesiastica constitutæ, munitæ fuerint, fidem sine vlla dubitatione haberi mandamus, atque decernimus.

Datum Romæ apud Sanctum Petrum, sub annulo Piscatoris, die vigesima quarta Martij, millesimo quingentesimo sexagesimo quarto, Pontificatus Nostri Anno V.

Ant. Florellus Lauellinus.

CLE-